



Suleqatigiinnissamik isumaqatigiissut

Siumut aamma Naleraq

2025 - 2029

Avannaata Kommunia naligiimmik ineriartorfiusoq

Avannaata Kommuniani naligiimmik ineriartorneq suleqatigiit pingaartippaat. Inoqarfiit Qaanaaq, Upernavik, Uummannaq, Ilulissat nunaqarfittaalu tamarmik innuttaasunut pitsaasunik atugassaqartitsiffiussapput kiffartuussiviullutillu. Inuussutissarsiortut ilanngullutik pitsaasunik atugassaqarnissaat qulakkeerneqassaaq, aamma suleqatigalugit ineriartortitsineq ingerlanneqassaaq. Kommunitsinni oqartussaaqataaneq nukittorsarneqassaaq, oqartussaaffinnik siammaanissaq aqutissiuunneqarluni. Avannaata Kommunia tassaassasoq innuttaasut sulisinnaanerannik atuinerusoq, atorluaanerusoq ineriartortitsisorlu.

Inoqarfinni tamani inuit ornittagaat atorluarlugit peqatigiinnermik ikorfartueqataaneq, soorlu timersornermik ingerlatsisut, peqatigiiffilerisut, pilersitsisartut, kulturilerisut, eqqumiitsuliortut, nipilersortartut allallu inooqatigiinnitsinnut nukittorsaasut erseqqissumik tapersorsornerisigut.

Tamatta najugassaqaqqulluta illunik sanaartorneq illoqarfinni nunaqarfinnilu annertusarneqassaaq. Sumiiffinni inuttussuseq aallaavigalugu sanaartornermut



aningaasalersuineq allanngussaaq, pisariaqartitsineq malillugu ingerlatsisoqalerluni. Sulisut Avannaanut nuuttut inissaqarniarnikkut periarfissaat ilanngullugit pitsanngorsarneqassapput.

Nunaqarfinni illoqarfinnilu aqquuserngit aqqissuunneri aallunneqassapput aamma katitertakkanik illuliorluni sanaartorneq piaartumik ingerlanneqarnerulernissaa aqqutissiuunneqassaaq. Inissialiorneq najukkani tamani, nunaqarfinni isorliunerusunilu aamma 95/5 atorlugu siuarsarneqassapput. 95/5 atorlugu sanaartorsinnaaneq annertuumik qaammarasaassutigineqassaaq.

Nunaqarfinni sullissineq pitsanngorsarneqassaaq, nunaqarfiit akisussaaffigisaat annertusinerisigut.

Aalisartut atugaat piffinni tamani pingaartillugit pitsanngorsarneqassapput, suliassanut ilaallutik umiatsialeriffiit, sannaviit, neqitsersuisarfiit assigisaallu aalisartut atortuminnik toqqorsiviginnaasaat ineriartortillugillu pilersiororneqarnissaaq, nunagissaaneq ilanngullugu. Aalisarfinni immap naqqani nunamilu saliisarnissat aallunneqassapput. Qassutaarsiutit maannamut misilittagaalersut aallaavigalugit piaarnerpaamik susassaartut suleqatigalugit aaqqiivigineqarnissat suliarineqassaaq, ilanngullugu qitiusumiit kommunip akisussaaffiitut tunngatillugu agguataarneqarsimanagerat paatsuungassutaasartoq aaqqiiffiginissaa sulissutigineqassaaq.

Umiatsiaararsorlutik aalisartut umiatsialivinnik isumannaatsunik pitsaasunillu isumalluuteqarnissaaq pisariaqarmat tamakku ineriartortinneqassapput.

Aalisartut piniartullu asimi unnuiffiginnaasaannik illuaqqanik piniariarfusinnaasunik sanaartorneq ingerlanneqassaaq.

Aalisarnermut siunnersorteqalernissaaq aqqutissiuunneqassaaq, aalisarneq aalisarnerinnaangimmat aamma allanut inuussutissarsiutinut saassinnaaneq periarfissaasariaqarmat.

Pitsaasunik nioqqutissiornissaaq pillugu aalisakkerinermik ilinniarfimmik pilersitsisoqarnissaa sulissutigineqassaaq, pingaartumik aalisakkat tamakkiisumik atorluarneqarnissaaq aqqutissiuukkumallugu. Ilinniarfik aalisakkanik naleqarnerulersitsinissaaq pillugu ilisimasaqarfiitut aamma atuutsissaaq.

Sanaartorneq ataavartoq ataqatigiisooq, nunaqavissunillu salliutitsilluni ingerlatsiffiusooq pilersinneqassaaq, ukiorlu kaajallallugu suliassaqartitsinissaaq ataavartunik suliffinnik pilersitsinissaaq siunertaralugu aqqissuussiffigineqassaaq.

Nunaqarfinni illoqarfinnilu illut kateriffigineqartartut sanaartorneqarnissaaq aqqutissiuunneqassapput, illoqarfinni nunaqarfinnilu ataatsimoortarnerit nukittorsaaffigineqarneranut iluaqutaasussamik.

Kommunimi sulisut ineqarnikkut piorsaaffiginissaaq pingaartillugu ingerlatsisoqassaaq, perorsaasut ilinniartitsisullu nunaqarfinni illoqarfinnilu ineqarfigisinnaasaannik sanaartornerit



ingerlanneqassapput, sulisut ataavartumik suliinnarnissaat nutaanillu sulisussarsiortarnermut aqutissiuusseqataassamat.

Inulerisut akissaatimikkut nalimmassaaffiginissaat aaqqissuussiffigineqassaaq, inulerisut ataavartumik suliinnarnissaat nutaallu amerlanerusut sulilernissaat anguneqaqqullugu aamma periarfissat assigiinngitsut allat misissorneqassapput.

Inunnut nappaammik eqqugaasunut ikiorsiissutaasartussamik ikorfartuutitut atorineqartartussanik aningaasaliisarnissaq aqutissiuunneqassaaq, kimulluunniit nappaat takkuttarmat taamaattoqartillugulu inunnut ilungersuuteqareersunut ajornartorsiulersunut akiligasaanut oqilisaataasussamik periarfissarsiuussisoqarnissaa pisariaqarmat. Inuit tamarmik sillimmaqartanngimmata innuttaasunut nappaammik eqqugaasunut aningaasaliinerunissaq siunertamut qulakkeerinnissaq, tamannalu erngertumik aqutissiuunneqassaaq.

Meeqqanut, inuusuttunut inersimasunullu eqqarsartaatsikkut tatitussutsikkullu nukittorsaaneq ingerlanneqassaaq, tamarmik inuunerinnerulernissamik siunertaqartillugit aamma inuttut sakkussalersuinissaq siunertaralugu.

Ulluunerani paaqqinnittarfimmiittuuteqarnermi akigititanut qummut killiliinissaq anguniarneqassaaq, angajoqqaanut oqilisaassinissaq anguniarlugu.

Eqqaavilerinikkut sullissineq pissusissamisut ingerlaqqullugu pitsanngorsaatsit ingerlanneqassapput aamma najugaqarfinni tamani nunagissaanerit najoruminarsaanerullu ingerlanneqassapput. Eqqaaveqarnikkut nutaaliorneq ingerlanneqassaaq, ilaatigut igitassat maqillugit betonimik poorlugit atortussanngortittalernerisigut. Taakku sissamut iliorarneqarsinnaasortai nunniutaassapput.

Inoqarfinni tamani imeq kuuginnartoq atorineqaleraluttuinnarneqassaaq, periuseq akisoreertoq qimakkiaartorlugu. Peqqissutsimut annertuumik tunngassuteqarmat pilersaarusiorluarneqarsimasumik suliniut ingerlanneqassaaq, tamannalu avatangiisinut aningaasaateqarfik annertusaavigineqarneratigut pissaaq. Anartarfeqarnikkut nutarterineq inerisarneqassaaq, imermik kuuginnartumik pilersuinerup aaqqissuussamik ineriartortinneqarnera malillugu.

Ikuallaaviit containerit avatangiisinut mingutsitsinngitsut atuutsilernissaat aqutissiuunneqassaaq.

Meeqqat atuarfianni meerartavut inuusuttavullu tamarmik siuariartussapput. Meeraq ataaserluunniit saaffissaqarani unissanngilaq, taamaattumillu ilinnialernissaanut praktikerfissaqarnissaanullu kommuni suleqataasaaq. Aamma Nunaqarfinni ilinniartitsisut naammattut pigineqassapput. Ilinniartitsisut kattuffiat aamma angajoqqaat peqatigalugit atuarfeqarfik atuarfitaliaap periarfissiisutaanik atorluaalluni ineriartorteqqinneqassaaq, ukiumut ullut atuarfiusut ikilisillugit aamma fagit ikilisillugit.



Atuarfiit, meeqqeriveqarfiit pinaveersaartitsinermullu suliaqarfiit suliassaminnut angummassinnaalluarneroqqullugit suleriaaserineqartut pillugit nalilersueqqittoqassaaq, meeqqanut periarfissiissutit pitsanngorsarneqarnissaat siunertaralugu. Suliassaq suliassaqarfinnik ilisimasalinnit susassaqtullu peqatigalugit ingerlanneqassaaq.

Meeqqat angerlarsimaffiup avataanut inissinneqartartut ikilisarneqassapput. Sulissutigineqassaaq ilaqutariit suleqatigalugit ataatsimoorluni ikiorserneqarfiusinnaasumik sakkussanillu aallerrfiusinnaasunik pilersitsinissaq. Suleqatigiit pingaartippaat ilaqutariit nukittuut peqqissullu ikorfartussallugit.

Suliffeqarfissuaq kommuni sulisunut nuannersuussaaq toqqissimanartuullunilu. Artukkiilluni suliaqarfissuut, allatigulluunniit artukkiisut aaqqiivigineqassapput, sullitat pitsaasumik sullinneqarnissaat siunertaralugu.

Utoqqartatta kalaaliminertornerusinnaanissaat periarfissaanerulersinneqassaaq, soorunami utoqqalisut nerisatigut mianersuutassaanerat eqqummaariffigalugu suleqatigalugillu.

Timersornermik ingerlataqartut najukkani tamani ajunnginnerusumik atungassaqtinnissaat peqatigiiffiit peqatigalugit sulissutigineqassaaq. Sunngiffimmi ingerlatallit pinaveersaartitsinermik annertuumik suliaqarmata, sunngiffimmilu sammisaqartitsinerit annikilliartuinnarmata, immikkut iliuuseqartoqassaaq.

Ukioq kaajallallugu timersorfiusinnaasunik pilersitsinissaq anguniarneqassaaq, nunaqarfinni timersortarfeeqqanik sanaartornissat tullerriaakkamik pilersaarusernerat ilanngullugit.

Takornarialerineq nunami maani najugaqartut aallaavigalugit ineriartortinneqassaaq. Takornariartaatinut talittarfik pisariaqarmat susassaqtartut suleqatigalugit pilersaaruserinneqassaaq. Politikikkut siuttut inuussutissarsiortut suleqatigalugit erseqqissumik anguniagaqarlutik siuarsaaqataassapput. Takornariaqarneq kommunitinnut tunniussaqaqarnerusinnaavoq, aamma suliffeqarfissuit avataaneersut tamakkiisumik illoqarfitsinniilersinneqartarnissaat akileraartunngornissaallu aqutissiuunneqassaaq. Takornarialerinermi pisuttuaasisut angallassisullu nunaqavissuunissaat aqutissiuunneqassaaq.

Turistråd allamik ateqalersinneqassaaq :visit ilulissat, imaluunniit visit avanna.

Mittarfissuartaalerpugut, taamaammallu Avannaata Kommuniani innuttaasut tamarmik periarfissinneqartariaqarput aningaasaliinissamut. Piginneqatigiilluni ingerlatsilersinnaaneq siunertaralugu pilersinneqartariaqarnissaanut suliniuteqartoqassaaq, namminersortut pitsaasumik atugaqarnissaat aqutissiuullugu.

Nunaqarfiit tunitsiveqanngitsut, inuussutissarsiornikkut ineriartortitsinermut atatillugu pilersitsiviginissaat anguniarneqassaaq, sukumiisumik Namminersorlutik Oqartussat namminersortullu suleqatigalugit.



Kaasarfimmiliinnarlugit sulisitsisarneq qimanneqassaaq, taarsiullugu aqqissuussamik sulisitsineq sutigut tamatigut eqqunneqaqqullugu sulissuteqartoqassaaq. Illoqarfinni ersarissunngortinneqassaaq suliffeqarfiit nunaqavissunit ingerlanneqarnersut, aamma illoqarfimmuut nunap assingani. Umiarsuarsuit avataaneersut nunaqavissunut toqqaannartumik suleqateqartunngornissaat aqqutissiuunneqassaaq, aningaasat kommunitisinnut iluaqutaaneruleqqullugit aamma kommunerput saqqummersitsinerni ersarinnerulernissaa sulissutigineqassaaq.

Illorsuit innuttaasunut assigiinngitsunut atorneqarsinnaasut (multihalit) ineriartortinneqassapput. Ilulissani naluttarfittaarsinnaaneq misissorneqarluni pilersaarusiorfigineqalissaaq, ilaatigut qanoq avataaniit aningaasaleeqataaffigineqarsinnaanera ilanngullugu.

Avannaani ilinniarnertuunngorniarfeqalernissaaq pisariaqartoq misissorneqassaaq, pingaartumik inuusuttut kommunitisinnut kajuminnartitsinerunissaat pillugu.

Qeqertamiit Ikerasaap tungaanut aqqusineqalernissaaq naafferartumik ingerlanneqalissaaq. Angallanneq iluatsissappat aamma takornariaqarneq siammarterneqarnerussappat aningaasarsiutaanerussappallu ineriartortitsineq ingerlanneqartariaqarpoq. Sapinngisamik aqquserngit tamarmik asfaltimik qallerneqarsimanissaat sulissutigineqassaaq.

Inuuniarnikkut unamminartorsiortunut ikiorserneqarsinnaaneq pillugu naatsorsuissunneqarluni ikiorserneqarsinnaaneq periarfissiisutigineqaqqittalissaaq. Tamanna utoqqarnut, siusinaarluni pisartagalinnut aamma allatigut unamminartorsiortunut atuutsissaaq.

Avataaniit aningaasanik atorniarnikkut sanaartorneq aallariartilluarneqassaaq, inuusuttullu siullermeerlutik namminerisamik ineqalerniartut qaammarsaaneq aqqutigalugu periarfissarsiusseqataaffigineqassapput.

Angallannikkut pissutsit aqqiiviginiarlugit susassaqtut qanimut suleqatigalugit aqqiissutissanik tigussaasunik ujartuisoqassaaq.

Inunnik isumaginninneq illersorneqarsinnaasumik eqaatsumillu ingerlanneqassaaq. Inuit innarluutillit ikiortariaqartullu sullinneqarnerat atugaallu pineqartunut naleqquttumik aqqissuunneqassapput. Siusissukkut iliuuseqartarneq nukittorsarneqassaaq, meeraaqqerivinniit aallartittumik. Inunnik isumaginninneq inunnut sullinneqartussanut pitsaanerpaamik ingerlaqqullugu, susassaqarfiit akimorlugit suleqatigiittarnissamik eqqussisoqassaaq. Taamaappoq aamma inuit innarluutillit immikkullu pisariaqartitsisut pineqartillugit. Isumaginninnermi aningaasaliineq tassaassaaq ineriartornissamut sinaakkutinik pilersitsineq, aamma saaffiginninneq erngertumik iliuuseqarfigineqarluni ingerlanneqartassaaq, kiffartuussassat ikiuinerillu pitsaasut salliunneqarlutik. Isumaginninnermi aningaasaliineq tassaassaaq ineriartornissamut sinaakkutinik pilersitsineq.

Nunaqarfinni utoqqarnut angerlarsimaffiit, utoqqaat illui utoqqarnullu nammineertunut inissiat sanaartorneqarnerulernissaat anguniarlugu pilersaarusiorneqassapput aallartinneqarlutillu.



Illoqarfinni nunaqarfinnilu umiatsialiveqarnikkut ineriartortitsineq susassaqtut suleqatigalugit ineriartortitsiviussapput, puttasut ilanngullugit. Umiarsualiveqarnikkut talittarfeqarnikkullu sumiiffiit sulii sanaartorfigineqanngitsut, naalakkersuisut suleqatigalugit "umiarsualiveqarnikkut pilersaarummut" ilanngutitineqarnissaat qulakkeerneqassaaq.

Nutaarmiuni Naajaanilu pisiniarfeqalernissaanut queqalernissaanullu suliniutit aallartinneqassapput.

Imigassap ikiaroorartullu ajornartorsiutaanera aallaavigalugu pinaveersaartitsinermik suliaqarneq nukittorsarneqassaaq, meeqqat inuusuttullu pillugit aamma ilaqutariit inuunerissaartut pilerseqqullugit.

Ilulissani sannavik ikuallannikoq sanaqqittussaq angininngorlugu sananeqarsinnaanersoq immaqalu qaanniormik ilinniarfinngorsinnaanersoq siunertaralugu sulisoqassaaq.

Illoqarfinni nunaqarfinnilu nukkassartarfeqalernissat suliniutigineqassapput.

Angerlarsimaffeqanngitsut eqqarsaatigalugit illoqarfinni tamani kialaarfinni peqalernissaat suliniutigineqassaaq.

Illut nutaanngitsut piiarneqarnissaat nutaanillu taarsorsorneqarnissaat aallartinneqassaaq. Illut nutaanngilisut inuttaanut tunineqarsinnaasut ajornanngippat tuniniarneqassapput.

Nunaqarfinni kommunip allaffii /sullissiviit nutarsarnissaat ullutsinnut naleqqussarlugit iliuuseqarfiginnissaat aallartinneqassapput.

Timersortarfeqqat nunaqarfinni aningaasassarsiorneqarlutillu suliarineqarlutik aallartinnissaat sulissutigineqassaaq.

Nunaqarfik Illorsuit ammaqpinneqarnissaa sulissutigineqassaaq, suliassarlu najugaqtut aamma Namminersorlutik Oqartussat suleqatigalugit ingerlanneqassaaq.

Ilulissat, 04. April 2025

Lars Erik Gabrielsen
Siumut

Jens Napätök
Naleraq